

《佛說八大人覺經》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) cbeta@ccbs.ntu.edu.tw

資料底本: 大正新脩大正藏經 Vol. 17, No. 779

No. 779

佛說八大人覺經

後漢安息國三藏安世高譯

為佛弟子常於晝夜至心誦念八大人覺

第一覺悟世間無常。國土危脆四大苦空。五陰無我生滅變異虛偽無主。心是惡源形為罪藪。如是觀察漸離生死

第二覺知多欲為苦。生死疲勞從貪欲起。少欲無為身心自在

第三覺知心無厭足。唯得多求增長罪惡。菩薩不爾常念知足。安貧守道。唯慧是業

第四覺知懈怠墜落。常行精進破煩惱惡。摧伏四魔出陰界獄

第五覺悟愚癡生死。菩薩常念廣學多聞。增長智慧成就辯才。教化一切悉以大樂

第六覺知貧苦多怨橫結惡緣。菩薩布施等念冤親。不念舊惡不憎惡人

第七覺悟五欲過患。雖為俗人不染世樂念。三衣瓶鉢法器。志願出家守道清白。梵行高遠慈悲一切

第八覺知生死熾然苦惱無量。發大乘心普濟一切。願代眾生受無量苦。令諸眾生畢竟大樂

如此八事。乃是諸佛菩薩大人之所覺悟。精進行道慈悲修慧。乘法身船至涅槃岸。復還生死度脫眾生。以前八事。開導一切。令諸眾生覺生死苦捨離五欲修心聖道。若佛弟子誦此八事。於念念中滅無量罪。進趣菩提。速登正覺。永斷生死。常住快樂